

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DR. LEE BOON CHYE  
(GOPENG)**

**PERTANYAAN : LISAN**

**TARIKH : 09.04.2014**

**Y.B. DR. LEE BOON CHYE [ GOPENG ] minta MENTERI KEWANGAN**

menyatakan setakat manakah Kerajaan memantau dan mengurangkan kegiatan ekonomi pasaran gelap.

**JAWAPAN**

Tuan Yang di-Pertua,

Pada umumnya, pasaran gelap merujuk kepada kegiatan perdagangan barang dan perkhidmatan yang tidak sah yang melibatkan

antaranya kegiatan penyeludupan, aktiviti penipuan cukai serta jenayah perdagangan, termasuk membuat pengisytiharan palsu dan aliran keluar kewangan haram.

Untuk makluman Berhormat, Kerajaan sentiasa memandang serius terhadap kegiatan yang melanggar undang-undang dan peraturan negara. Sehubungan itu, antara inisiatif untuk yang telah diambil untuk memantau dan mengurangkan kegiatan ekonomi pasaran gelap ini adalah memasang mesin pengimbas di pintu masuk negara untuk membendung daripada kegiatan penyeludupan, meningkatkan usaha sama antara agensi bagi membanteras dan mencegah penyeludupan di sepanjang sempadan, seperti penubuhan Unit Pencegah Penyeludupan (UPP), serta mengambil tindakan terhadap entiti perniagaan dan individu yang mengelak cukai Kastam, khususnya dalam kes pemalsuan invois eksport dan import barang.

Selain itu, Kerajaan juga telah mengambil beberapa langkah bagi mencegah aliran keluar kewangan haram. Antaranya termasuk;

1. Penubuhan Pasukan Petugas Khas Pelbagai Agensi Peringkat Tinggi pada 2010,
2. Menguatkuasa Akta Perniagaan Perkhidmatan Wang 2011 pada 1 Disember 2011, dan
3. Melese semula semua perniagaan perkhidmatan wang yang telah selesai dijalankan pada tahun 2012 dan mengurangkan bilangan pengurup wang daripada 839 kepada 511.

Pada masa hadapan, kegiatan ekonomi pasaran gelap ini juga boleh diatasi dengan pelaksanaan cukai barang dan perkhidmatan (GST) yang memerlukan pelaporan nilai ditambah pada pelbagai peringkat pengeluaran. Selain itu, Kerajaan juga akan menambah baik penguatkuasaan sedia ada serta meningkatkan kemahiran dan integriti pegawai di jabatan dan agensi yang berkaitan bagi mengurangkan peratusan kegiatan ekonomi pasaran gelap ini.

Tuan Yang di-Pertua,

Ekonomi Malaysia tidak dipengaruhi oleh kegiatan ekonomi pasaran

gelap, malahan, pertumbuhan ekonomi negara kini terus berkembang disokong oleh asas makroekonomi yang kukuh. Sumber pertumbuhan ekonomi juga telah menjadi lebih pelbagai dan seimbang dalam semua sektor ekonomi dan disokong oleh kepelbagaian rakan perdagangan. Sementara itu, sektor kewangan yang berdaya tahan dan sistem perbankan yang kukuh serta perundangan yang lebih teguh dapat menyokong usaha mencegah aktiviti ekonomi pasaran gelap ini agar tidak berlarutan.